

PERSVERKLARING

6 AUGUSTUS 2020

Insake: Binnelandse Sake se goedkeuring aan die NGK vir die voltrekking van selfdegeslagverbintenisse

Die Opvolgpaneel van die 2020 Spesiale Beraad Moreletapark, het met skok en ontsteltenis kennis geneem van media berigte dat die Nederduitse Gereformeerde Kerk (NG Kerk) nou deur die Algemene Sinodale Kantoor amptelik by die Minister van Binnelandse Sake aansoek gedoen het om as godsdienstige organisasie aangewys te word, wat selfdegeslagverbintenisse ingevolge die *Wet op Burgerlike Verbintenisse* (Wet 17 van 2006) bevestig. Verskeie navrae is van leraars en lidmate ontvang, wat ontsteld is oor die ontydige en ongemagtigde optrede van die Algemene Sinodale Kantoor. Sinodes, ringe, kerkrade, leraars en lidmate word versoek om hulle ten sterkste uit te spreek teen hierdie optrede en om hulle amptelik daarvan te distansieer, en wel om die volgende redes:

1. Daar is nie by die Algemene Sinode van 2019 besluit om by die Departement van Binnelandse Sake *namens die NG Kerk as denominasie* aansoek te doen vir die aanstelling van gelegitimeerdes van die NG Kerk om bevestigings van burgerlike verbintenisse te wees nie.
2. Die Algemene Sinode van 2019 het besluit dat daar *net vir leraars wat selfdegeslagverbintenisse wil bevestig, aansoek gedoen sal word vir registrasie* by die Minister van Binnelandse Sake.
3. Daar is nie by die Algemene Sinode van 2019 besluit dat aansoeke vir aanstelling as bevestigings van burgerlike verbintenisse, *deur die Kantoor van die Algemene Sinode* gedoen mag word nie.
4. Aansoeke by die Departement van Binnelandse Sake vir gelegitimeerdes van die NG Kerk om as huweliksbevestigings aangestel te word ingevolge die *Huwelikswet* (Wet 25 van 1961), geskied deur die sinodale kantore (vgl. Reglement vir Beroeping, Bevestiging, Demissie en Emeritaat van Predikante, 10.9.1) en daarom behoort enige aanverwante aangeleenthede op die terrein van die streeksinodes.
5. 'n Amptenaar in diens van die Algemene Sinode het geen opdrag of bevoegdheid van die Algemene Sinode ontvang om ingevolge die *Wet op Burgerlike Verbintenisse* aansoek te doen vir die aanstelling van bevestigings van burgerlike verbintenisse nie.
6. Die *Handelinge* van die Algemene Sinode 2019 is nog nie gepubliseer nie, met die gevolg dat besluite van die Algemene Sinode geneem in 2019 nog nie in werking getree het nie.
7. Terwyl die NG Kerk skerp verdeeld is oor die aangeleentheid van selfdegeslagverbintenisse, en sinodes, ringe en kerkrade die reg het om hulle eie besluite daarvoor te neem, word hiermee nou 'n besluit van die Algemene Sinode op alle ander kerkvergaderinge in die NG Kerk afgedwing.

8. Die *Wet op Burgerlike Verbintnisse* maak dit moontlik vir gelegitimeerdes van die NG Kerk om direk by die Minister van Binnelandse Sake aansoek te doen om as bevestigings van burgerlike verbintnisse aangestel te word.
9. 'n Aantal gelegitimeerdes van die NG Kerk het reeds op eie inisiatief sodanige aanstelling bekom, hetsy onder eie naam of in naam van 'n godsdienstige organisasie anders as die NG Kerk, en voltrek reeds vir jare burgerlike verbintnisse, ongeag die besluite van die NG Kerk.
10. Druk is vermoedelik met ander motiewe en wederegtelik op die Kantoor van die Algemene Sinode uitgeoefen om namens die NG Kerk, en nie slegs namens leraars wat selfdegeslagverbintnisse wil bevestig nie, daarvoor aansoek te doen.
11. Dit is gedoen om die NG Kerk in al haar vergaderinge en alle gelegitimeerdes van die NG Kerk, ook diegene wat sodanige verbintnisse op Bybels-teologiese gronde sterk afkeur, daarmee te kompromitteer.
12. Die wyse waarop die openbare media die goedkeuring van die NG Kerk se aansoek gekommunikeer het, deur nie die onderskeid tussen huwelike en burgerlike verbintnisse, soos deur die twee afsonderlike wette én die besluite van die Algemene Sinode 2019, te handhaaf nie, het reeds tot groot skade binne en buite die NG Kerk gelei.
13. Weens die feit dat die besluite van die Algemene Sinode 2019 as onbybels en onkerkordelik geag word, en weens die feit dat 'n aantal kerkvergaderinge reeds 'n formele geskil daaroor teenoor die Algemene Sinode verklaar het, kan nóg die Algemene Sinodale Kantoor nóg streeksinodes se gevolmagtigde(s) nóg gelegitimeerdes van die NG Kerk in hierdie aangeleentheid handel, alvorens die Skrifgefundeerdheid, wettigheid en regsgeldigheid van die besluite bepaal is, en die geskille wat bestaan, behoorlik uit die weg geruim is.

Gelegitimeerdes van die NG Kerk wat oor 'n aanstelling as huweliksbevestigter ingevolge die *Huwelikswet* beskik, word versoek om as *vrywaring* 'n skrywe aan hul sinodale kantoor te rig met die versoek dat die Minister van Binnelandse Sake skriftelik in kennis gestel word dat die huweliksbevestigter op grond van gewete, godsdiens en geloofsoortuiging, beswaar het teen die bevestiging van burgerlike verbintnisse. In hierdie skrywe moet die volle besonderhede van die huweliksbevestigter verstrek word (naam, van, adres, kerkverband en aanstellingsnommer).

Kerkvergaderings, ampsdraers en lidmate wat hierdie verklaring ondersteun of in die lig daarvan ook nou wil doleer of 'n geskil met die Algemene Sinode wil verklaar, word uitgenooi om die opstellers te kontak by beraad@moreleta.co.za